

unvirzollend und ane sleschatz widder herußfuren, unde ist nymande nicht davon zcu gebin. Auch wo der die frucht henne virkeuffte, der dede davon, als sich geborte zu düne mid zcolle unde mid sleschatze.

Auch was ein burger usfurte von frochten, von wyne, von byere, adir was das were, daz sin were, da ist he nicht von schuldig zcu gebin, ez inwere dan, daz he daz eyne andern uzmanne virkeuffte zcu fürne, der ußman solde 1 peng zcu wegelde gebin unde nicht me, unde der burger nicht obiral.

Were auch, das ein prister adir ein edilman wyn adir byr adir frochte henußfurten, daz sie virkoufften unde nicht indrunken adir ynysßen, davon sulden sie ern sleschatz gantz gebin, das were der wen 1 peng, der karn 1 hll. unde keynen zcol.

Were auch, das sie daz drunken und eßen in eren husern unde nicht virkeufften, da ynweren sie nicht von schuldig zcu gebin noch zcol noch sleschatz.

Auch was ein man adir ein wip frochte von heymen dragent, wilcherley frocht daz ist, unde brengend daz zcu merte, da insint sie nicht vone schuldig zcu gebin, wie thure sie daz virkeuffent.

Auch was ein man adir wip frochte hynne koufften, die sie off erin helsin heymlrügen, da insint sie auch nicht vone schuldig zcu gebin dorch er unsanfften dracht willen.

Auch was ein man adir wip herdragend von eygern unde von kesin, weich adir hardt, von flassee, von haniffe und von wilcherley kouffmanschatz das were, ane frocht, daz sie virkeufften obir ein s. penge, daz gebe 1 hll. zcu zcolle und nicht me. Virkeuffte das die kouffma(n)schatz undir eyne schilling penge, so ingebe ez nicht davone.

Von zwein gensen 1 hll. zcu zcolle, die einis virkeuffte.

Auch was ein mensche hunere truge adir enthin, daz sie virkeuffte obir 1 s. penge, daz gebe 1 hll. davon zcu zcolle und nicht me.

Auch was ein igliche mensche treid von absiß wegen von heymen, ez sie wilcherley daz sie, da ingibt ez nicht vone, wie ez daz virkeuffen mag.

Auch von eyne düppen bodirn adir honige, daz undir seß grossen gildet, daz gibt 1 hll., unde daz babir seß grossen virkoufft wirt, da gibt man 1 peng zcu zcolle unde nicht me.

Von eyne centener bachinleischez, essefleisch, gesalczin fleisch, wilcherley daz were, das geste hie lassint wigen, die gebint von eyne centener 2 penge zcol, 2 penge sleschatz unde 2 penge zcu wigen, unde eyn burger obiral von ye deme centener zu wigen 2 penge und nicht me.

Von eyne centener unsledis adir smerres 2 penge zol unde 2 penge sleschatz unde 2 penge zcu wigen.

Auch von eyne centener hartzis, bechis unde wagensmers, krydin, wynstein 1 hll. zcol, 1 hll. sleschatz unde zcu wigen 2 penge.

Auch von eyne centener koppirs adir estrich 2 penge zol, 2 penge sleschatz, 2 penge zcu wigen.